

Falta di luga y boluntario hopi biaha no ta contribui na un solucion di adiccion

ORANJESTAD – Hopi biaha falta di luga ta haci cu e combatimento di adiccion ta keda riba un nivel minimo, anto ta haci cu e adicto no ta recupera manera mester ta. Si tuma un ehempel di schichofrenico nan, na momento di crisis hopi biaha nan ta keda algun dia so, pa despues sali bek riba caya of purba di gana nan den un di e centronan cu tin disponibel. No solamente luga ta un factor, pero personanan boluntario cu kier traha cu adicto. Segun Sra. Audrey Croes-Lacle, directora di Adopt an Addict, tin un scarsedad di hende cu kier traha boluntario pa un fundacion.

PRESUPUESTO NO TEY
Ta bisa cu hopi biaha e presupuesto no t'ey pa por piki

e adictonan, of pa huur un cas special pa cierto specialidad nan pa pone un dak riba cabes di diferente gruponan di sociedad (hoben, homber y muhe mas adulto). Tambe mester tene na cuenta cu e grupo cu ta dobel trouble, esta hendenan cu tin problema mental, conhuntamente cu e problema di adiccion, cu mester di un cuidio special.

VOLUNTARIONAN

Sinembargo, e tiki boluntarionan cu tin cu ta traha den cuidio di ambulante manera esunnan di Adopt an Addict den nan manera di traha, ta preocupa pa e adictonan ambulante, ta yama e adictonan, tin biaha si ta riba caminda y sa unda nan ta of ta traha ta

bay wak e adictonan, combersa cu nan, e ta un sistema di buddy, caminda cu ta keda tene contacto, lag'e sinti cu e tin un balor pa comunidad pa e no cay bek. E hendenan aki semper nan bida nan a wordo menosprecia, falta di atencion, falta di amor, falta di union, ta bin for di un famia des funcional. Tin biaha mal amigo cu nan a topa cu nan y a desea di bay den peer pressure system, caminda ken por mas y haci mas y nan ta bay e mal caminda nan ey. Ora cu ta buddy cu nan, hopi biaha e ta yuda.

BOLUNTAD DI E ADICTONAN

E sistema di traha di e fundacionnan na Aruba ta dife-

rente manera esun cu tin na Hulanda cu ta cana bishita e adictonan. Nos cultura ta diferente. Akinan tin e sistema cu tin e gruponan di sosten, caminda e ex adicto por bin na e reunionnan, pero despues di bin algun biaha, no ta bolbe mira nan.

Nan ta somenta for di mapa. boluntarionan ta bay na e reunionnan di e gruponan di sosten, entre nan Narcoticos Anonimos of Alcoholicos Anonimos, pa asina duna sosten na e ex adictonan pa kik af e bicio. Tin biaha e ex adictonan tambe ta wordo hiba na e reunionnan aki. Sra. Croes-Lacle ta menciona cu tambe tin tratamiento na e cas mes na Moko, caminda Adopt an Addict ta ubica, pa nan clientenan

mes of hendenan cu tabata na Republica Dominicana den e programa di rehabilitacion cu a bin pa terapia. Hopi biaha despues di seis of ocho luna cu e ex adictonan bandona e cas, ta haya cu nan ta bin na e reunionnan aki, pero despues no por wanta mas.

HOPÍ SOSTEN

Lo ta hopi bon pa comunidad tambe, den su afan pa caba cu e bicio di droga, pa duna sosten y bira boluntario na un di e fundacionnan aki, demostrando e adictonan ambulante cu nan tambe ta forma parti di comunidad y ta causa preocupacion pa un y tur. Core nan of ignora nan no ta yuda nan cu nan formacion y rehabilitacion. □